



U Domu kulture Cazin održana je predstava "**Ne igraju na Engleze**", tuzlanskog teatra "**Mungos**", koju su naši sugrađani imali priliku vidjeti u utorak, 01.12.2009.godine. Riječ je o komediji, koja se bavi životom trojice muškaraca u ranim tridesetim godinama koji na teletekstu po cijeli dan prate rezultate fudbalskih utakmica, a glavne uloge tumače

Dragan Pirić, Ademir Hagić i Šaban Mujkanović

. Režiju potpisuje Slobodan Ćustić (publici poznat po glavnoj ulozi u filmu "Kuduz")

Baveći se pomnim posmatranjem teleteksta, pravljenjem precizne strategije kako da se na utakmicama engleske lige zaradi što više novca i organiziranjem rituala praćenja rezultata, ova tri momka su zaboravila da zapravo žive svoj život. Pošto je uvijek neko drugi kriv za probleme koji ih prate, pošto je u Bosni nemoguće "živjeti" i pošto se sve to može zaboraviti uz konzervu piva i tiket, oni su na taj čuveni komadić papira položili ne samo svoj novac, već i svoje dvadesetosmogodišnje prijateljstvo.

Članovi ovog teatra su vrlo mlada ekipa, koja je svojim nesebičnim kulturnim radom i umjetnošću već prepoznata kao veliko osvježenje na glumačkoj sceni u BiH.

Isti dan su održane 2 predstave za učenike II Srednje škole u jutarnjem i popodnevnom terminu, a u večernjim satima predstava je prikazana građanima **općine Cazin**.

